

## Pitan Akinafarir Namba 2

### *Akar Faragha Zuim*

Akinafarir kamın akar mingarimra kara. Tisan maba arua Kraisin adarazir nighnizir gavgaviba ko arazir aghuibagh asighasisi. Ezi Pita akinafarir kamın aven miġia ghaze, Kraisin adarazi men akaba baraghan marki. Me, akar aposelba men sure gamizibar suiragh gavgafigh. Egħti arazir kamın me God ko Ekiam Krai Iesus deravira aning ġifogham. Aposelba uari uan damazibar Iesusin ganigha egha uaghan an gara a barazi, a men sure gami.

Gumazir maba kamaghın miġei Iesus ua izan kogham. Ezi akinafarir kam ghaze, a izam. Guizbangira a zuamira izeghan koghamin mingarim kamakın: God gumazitam ovengan aghua. A kamagh sua, gumaziba bar navibagh iragh. Kamaghın amizi a gumazamiziba dughiam me ganiga, egha me mizua ikiavira iti (3:9).

**E arazir aghuibar amuti da en navir averiabar iki gavgavigham, egħti e gumazir kurabar akaba batogham**

### *(Sapta 1-3)*

<sup>1</sup> Ki Saimon Pita, ki Krai Iesusin ingangarir gumazim ko an aposel. Ki, ia gumazamizir nighnizir gavgavir aghuimın itiba, akar kam ia bagħa an

osiri. Krais Iesus en God, a en Akurvazir Gumazim. Egha a uan arazir aghuimîn God nighnizir gavgavir aghuim ia ganingizima, ezi ian nighnizir gavgavir kam, an enanam ko voroghira ghu. <sup>2</sup> Ezi datirighin ia God ko en Ekiam Iesus, aningîn fofozir aghuim inis. Ezi kamaghin apangkuvir arazim ko navir amirizim ian ekevegh iki.

### *God ua baghavira e amisefe*

<sup>3</sup> Krais Iesus a God, an gavgavim a biziba bar e ganingi, da gavgavim e daningtima, e ikirimirir aghuim iniva e God ifongezir arazibar amu ikiam. E Krais gifo, ezi fofozir kam e gamima e God ifongezir arazibagh ami. Ezi a ko itir arazim ko an arazir aghuimîn, an en dia. <sup>4</sup> Egha bizir bar aghuiba e ganingi, da bar ekefe. Ezi kar bizir a fomira e daningasa akam akiriziba. E nguazir kamîn itir gumazamiziba, e navir ghurimîn araziba bagha puv aguema, ezi da bar pazav e gami. Ezi Krais bizir aghuir kaba bar e ganingi, ezi tuavir kamîn, a ian akuraghti, ia arazir kurar kabagh itaghiva, egh Godin ikirimirim inighiva egh an arazibar amuam.

<sup>5</sup> Bizir kabanang bagh, ia Godin min ikirimirim ikisi pamten ingar. Ia datirighin nighnizir gavgavim Kraisin iti. Egh uaghan arazir aghuibar gumazamizir igharazibar amu, egh uaghan Godin fofozir arazim deravira a inigh. <sup>6</sup> Egh uaghan navir ghurimîn araziba da dikabin, egh uaghan tugh gavgavigh osimtiziba ater, egh uaghan God

---

**1:2:** Ju 2    **1:3:** Jo 17:3, 2 Te 2:14, 2 Ti 1:9, 1 Pi 2:9    **1:4:** 2 Ko 7:1, Ef 4:24, 2 Pi 2:18-20, 1 Jo 3:2    **1:5:** 1 Pi 3:7, 2 Pi 3:18    **1:6:** Ga 5:22-23

ifongezir arazibar gın mangi. <sup>7</sup> Egh uaghan, uan adarazir mın, Kraisin adarazir apangkuvigh men akurvagh. Egh uaghan igharaz darazigh ifongezir arazim damu.

<sup>8</sup> Ezi ia Kraisi Iesus gıfo, en Ekiam. Egh ia arazir kaba inightıma da ian iki bar gavgavighti, eghti ian fofozir kam deravıra ingartıma, dagher avırıba otivam. <sup>9</sup> Ezi gumazitam arazir kaba puvatıgham, a bizir saghuıamın tıbar ganan kogham, a mati gumazir okavırızim moghın ikiam. Guizbangıra, God an arazir kurar a fomıra amizıba gın amada, egha a gamızıma a zue. Egha datırıghın bizir kaba, a da bakınıghniki. <sup>10</sup> Nan adarasi, God ian diagha gıfa, egha ia ginabas, ezi ia an gumazamızar ikiam. Egh kamaghın ia zurara an adarazir ikıvıra ikıva egh bizir kam akaghsıva, ia bar pamtem ingar. Egh ia kamaghın damuva, ia arazir kuratamın ırıghan koghıva, egh God ateghan kogham. <sup>11</sup> Eghti a tuavir kam bar ia bagh a kuightıma ia God Bizibagh Atıvamin Dughiamın aven mangiti a ia bagh bar akuegham. Egh dughiar kamın iki mamaghıra ikiam. God Bizibagh Atıvamin Dughiam, a bar Kraisi Iesus en Ekiamın bizim, a en Akurvazir Gumazim.

<sup>12</sup> Ki bizir kaba bagh ia mikımvıra ikiam. Ia guizbangıra dagh fogha ia guızın akam inıgha gıfa, egha an tugha gavgafi. <sup>13-14</sup> Ki fo, dughiar bar otevim, ki uan mikarzim suevkinıgham. En Ekiam Kraisi Iesus kamaghın na mikemegha gıfa. Kamaghın dughiar ki aven nivafızir kamın ikiavıra

---

**1:7:** Ga 6:10, 1 Te 5:15, 1 Jo 4:21    **1:8:** Jo 15:2, Ta 3:14    **1:9:** Hi 9:14, 1 Jo 1:7, 2:9-11    **1:10:** 2 Pi 3:17, 1 Jo 3:19    **1:12:** Fl 3:1, 1 Pi 5:12, 2 Pi 3:1, 3:17, 1 Jo 2:21, Ju 5

itim, ki nighnizima a dera, ki ua bizir kaba bagh ia mikimtima, ia ua dagh nighnighvira ikiam. <sup>15</sup> Kamaghin amizima, ki bar deragh ia mikimasa. Eghti ki gin oveghti, ia dughiabar zurara ia bizir ki ia mikemezir kabagh ua dagh nighnighvira ikiam.

*Aposelba uan damazibar Godin angazangarimin garima a Kraisin iti*

<sup>16</sup> Ezi dughiar e Kraisin akar kamın ia mikemezim, e pura gumazitamin eghaghanitam ko nighnizimin gin ghua ia migeir puvati. E uan Ekiam Krai Iesusin gavgavim ko a ua izamin akamin gun ia mikeme. Ezi e faragha uan damazibara Godin angazangarim ko gavgavimin garima da Krai Iesusin iti, kamaghin amizima e migei.\* <sup>17</sup> Ezi God Afeziam ziar ekiam a ganingi, egha angazangarir aghuir kam gamizima an an oto. Ezi God uabi uan Nguibamin ikia angazangarir ekiar kamın aven ikiava egha kamaghin Iesus migia ghaze, “Kar nan Otarim, ki bar a gifonge, egha ki a bagha bar akonge.” <sup>18</sup> Ezi e uari a ko Godin mighsiamin ikia egha akar kam barazima a Godin Nguibamin ikegha zaghiri. <sup>19</sup> Kamaghin amizima e nighnizir gavgavimra Godin akam inigha izir gumazibar akabar iti. Ezi ia uaghan men akabar suiragh gavgavigh, egh deragham. Godin akam inigha izir gumazibar akaba mati lam mitatemın ikia isi. Egha ghua Kraisin angazangarim ian navir averiabar aven

---

**1:16:** 1 Ko 1:17, 1 Jo 1:1 \* **1:16:** (1:16) Akar otevir kam a dughiar Iesusin mikarzim igharagha gara otozir bizibav migei. (Mt 17.1-3 ko Mk 9.2-13 ko Lk 9.28-36.) **1:17:** Mt 3:17 **1:19:** Sng 119:105, Jo 5:35, MAA 2:28

ikia isi, mati am̄nim itir mikovezim overiam̄in  
ikia isima mitatem zuima angazangarim oto.†

20-21 Fomira Godin akam inigha izir gumazim̄in  
akatom, pura gumazitam a mikemezi an a migeir  
puvat̄i. Godin Duam uabi me gaghuavkirima me  
Godin izezir akam akuri. Kamaghin bizir ekiam,  
ia a gifogh a kamakin, Godin akam inigha izir  
gumaziba, me Godin Akinafarim̄in osira me uan  
nighnizibar osirizir puvat̄i.

## 2

*Ifavarir tisaba Kraisin adarazir nighnizibagh  
asighasighasa*

<sup>1</sup> Ezi fomira Godin akam inigha izir gumazir  
ifavarir maba, me Israelin gumazibar tongin iti.  
Ezi kamaghira ifavarir tisaba uaghan ian tongin  
ikiam. Egh me nimira ia gifar, Godin bizir taba ian  
sure damuam. Egh me mongiva akar ifavaribar  
amuti, da ian tongin otivam, kar akar ian nighnizir  
gavgavim gasighasiziba. Ekiam ua me inis, eghti  
me uamategh akirim ragh, Ekiam gasaragham.  
Ezi me kamaghin damuva, eghti zuamira God me  
gasighasigham. <sup>2</sup> Eghti gumazir avirim men arazir  
mizirizir kurabar gin mangam. Eghti bizir kam  
gumazibar amuti me akar kurabar guizbangin  
tuavir Godin gin zuimin mikimam. <sup>3</sup> Ezi ifavarir  
tisan kaba dagiar aviriba bagha, kamaghin me  
eghaghanir ifavarir aviribar amuva, ian dagiaba

---

† **1:19:** (1:19) Mizarazim̄in mikovezir kam, kar Krai Iesus. Ni  
gansi Akar Mogomem 22.16in gan.   **2:1:** Mt 24:11, Ap 20:30, 1  
Ko 6:20, Ef 1:7, 1 Ti 4:1, 2 Ti 3:1-5, 1 Pi 1:18, Ju 4   **2:3:** Ro 16:18, 2  
Ko 12:17-18, 1 Te 2:5, 1 Ti 6:5, Ta 1:11, 2 Pi 1:16

ko biziba iniam. Fomira God me isi kot darighasa dughiam ati, a ghaze, me bar ikuvigham. Ezi God akuir puvati. A fomira me mikemezir moghin egha me gasighasighasa me bagha gara iti.

<sup>4</sup> Ia fo, bar fomira enselin maba arazir kurabagh ami, ezi God me ataghizir puvati. A senba me kegha helin me akunizima me mitater bar ekiamin aven ti. Egha me kalabusin ikiavira iti, me Godin kotiamin dughiam bagha mizua iti. <sup>5</sup> Ezi gumazamizir bar fomira ikeziba, me Godin akam barazir puvati. Ezi a me gasighasiki. An aperiam gamizima an otogha bar me kuavareme. Ezi Noa a gumazir arazir aghuibara gun migeir mam, God a ko 7 plan gumazamiziba bar deragha men garima me deravira iti.

<sup>6</sup> Ezi God Sodom in nguibam ko Gomoran nguibam migia ghaze, aning uaghan ikuvigham. God aning gaborozi aning bar isigha, averenir kiniba iti. Ezi gin gumazir Godin akaba batoziba, me bizir Sodom ko Gomoran otozim ginighnigh, egh fogham bizir kam gin uaghan me bativam.

<sup>7</sup> Ezi God Lot in akura, gumazir deravira itim. Egha a, men arazir mizirizibar gara an navim bar a baseme. <sup>8</sup> Gumazir aghuir kam Lot men tongin ikia egha men arazir bar kurabar gari. Egha dughibar zurara men akar kuraba barasi. Ezi an navim deragha iti. Ezi a me Godin araziba batozir arazim bagha an navim bar ikufi. <sup>9</sup> Ezi kamaghin e bizir Ekiam amizibagh nighnigha,

---

**2:4:** Lu 8:31, Jo 8:44, 1 Jo 3:8, Ju 6, MAA 20:2-3    **2:5:** Stt 6:1-7:24, 8:18, Hi 11:7, 1 Pi 3:20, 2 Pi 3:6    **2:6:** Stt 19:24, Nam 26:10, Ju 7  
**2:7:** Stt 19:1-16    **2:9:** Sng 34:17-19, 1 Ko 10:13, Ju 6

egha e fo, osımtızitam gumazir Godın arazibar gin zui tam batogham, God osımtızir kam uam ada a iniamin tuavim gıfo. Ezi God arazir kurabagh amir gumazibagh fo, egha men arazir kuraba ikarvaghamin tuavim gıfo, mamaghıra iki mangıva Godın Kotın Ekiamin Dughiam otogham. <sup>10</sup>Egh gumazir taba ivezir kurar bar ekiaba iniam. Kar gumazir poroghamiba uari isava akuava amir arazir bar mızırızıba. Egha me Godın akam mıgıa ghaze, a pura bizim.

Ezi gumazir kurar kaba ian tongın iti, gumazir akaba batogha egha uan niğhnızıbar gin zuıba. Egha me atiatir puvatıgha akar kurabar enselin Godın Nguibamin itıbav gei. <sup>11</sup>Ezi enselba bar gavgavir ekiam ikia, bar gumazir kabagh afıra. Egha enselba uari akar kurabar me mıgeir puvatı, egha Ekiamin damazımın akam me gasir puvatı.

<sup>12</sup>Ezi ifavarir tisan kaba, me mati asızıbar mın niğhnızıba puvatı, egha me uan mıkarzıbar ifongiabar arui. Egha me mati asızir atıabar mın nguazımın otifi, eghtı gumazıba men suıghıva me mısoğhtıma me arıghıram. Ezi bizir me fozir puvatızim, me akar kurabar a mıgei. Ezi arazir kamra mati gumazıba asızir atıaba gasıghasızi moghın God me gasıghasıgham.

<sup>13</sup>Ezi me amızir arazir kurabar, gumazıba men arazir kaba bagh ua arazir kurabar me ikarvaghām. Me ghaze, aruebar dagher ekiaba apir arazim ko dıpar onganıba apir arazim, kar arazir bar aghuim. Egha me ia koma apava, egha ia gamıma ia bar mıze, egha ian zıabagh asıghasısi.

Egha me uan ifavarir arazir me amiba bagha bar akonge. <sup>14</sup> Egha me zurara amizibar gara, arazir kurabar me damuasa nighnisi. Egha me arazir kurar amiba givasa nighnizir puvati. Me gumazir nighnizir gavgavir muziariba itibagh ifarima me arazir kurabagh ami. Egha me igharaz darazir bizibar garava, egha dagh ifongezir arazimın bar me gizifa. Eghti God bar me gasighasigham! <sup>15</sup> Me tuavir aghuim ategha, bar onganigha tintinibar zui. Me Beorın otarim Balamın tuavimın gın zui. An arazir kuram gamigha, egha uan arazir kurar kamın ivezim iniasa. <sup>16</sup> Ezi donkiba mişgeir puvati. Egha donkin mam gumazimın mın mişgei, egha Balamın arazir kuraba bagh an atari. Ezi arazir kam donki Godın akam inigha izir gumazir kam gamima, a uan onganir arazir a damuasa nighnizim ataki.

<sup>17</sup> Gumazir kaba, mati mozir dipaba dakezir moghın iti, egha uaghan mati aminir ekiam ghuariam givava amadima a tintinibar zuima amoziba puvati. Ezi God me bagha danganir bar mitategha bar pighizim akirizima a iti. Eghti me mangiva an ikiam. <sup>18</sup> Ezi gumazir kaba pura tiariba akara egha uan akar onganir kabav gia ghaze, erara dera. Me gumazamiziba apezeperava me gamima, me naviba dikavava arazir poroghamiba uari isava akuiba, ko nivafizimın arazir kurar igharazibar amuasa nighnisi. Ezi arazir kamın, me gumazamizir datirighira navibagh iragha egha arazir kuraba ataghiziba, me me gamima me gumazir kurar kabar gın zui.

---

**2:15:** Ju 11, MAA 2:14    **2:17:** Ju 12-13    **2:18:** Ap 2:40, 2 Pi 1:4, 2:20, Ju 16



19 Ezi gumazir kurar kaba kamaghın miği, “Kamaghın ia en gın mangıva, egh ia fıriğhrehg uan niğhnizibar ifongezir bizibar amuam.” Ezi men arazir kuraba me gasıghasızima, me uari pura ingangarir gumaziba. E fo, gumazitam bizitam a ikirarighti, a bizir kamın pura ingangarir gumazımın mın ikiam. 20 Guizbangıra, me en Ekiam Kraıs İesus da fofozim inis, en Akurvazir Gumazım. Ezi fofozir kam men akurazi me arazir mızırızir nguazımın itiba bar adagh ita. Egh kamaghın me ua arazir kurabar amuti, da ua me ikirariğh egh bar me gafiragham. Eghti men ikirimirim gın bar moghıra bar ikuvigh fomıra itir ikirimirim gafiragham. 21 Kamaghın me arazir aghuımın tuavim gifozir puvatıgha, deraghai. Ezi datirıghın me tuavir kam gıfo, egha Godın akaba ini, egha uam akirim ragha God gasara. Ezi bizir kam bagh me bar ikuvigham. 22 Ezi bizir men otozir kam, guızın akar otevir mamın aven kamagh miği, “Afiam migha egha ghua ua uan mimiziba api.” Ezi uam akar otevir ıgharazir mam kamaghın miği, “Dam dipam guregha gıfa, egha ua ghua beghneazim gıpoghposi.” Anıngın arazim vırara bar kufi.

### 3

#### *Bar guizbangıra Ekiam ua izam*

1 Nan rooroaba, kar nan namba 2ın akınafarım ki datirıghın ia bagha an osiri. Ki kamaghın ifonge, akınafarır ki osirızir kamning, ian niğhniziba uam

---

**2:19:** Jo 8:34, Ro 6:16, 1 Pi 2:16    **2:20:** Mt 12:45, Lu 11:26, Hi 6:4,  
2 Pi 1:2-4    **2:21:** Lu 12:47-48, Jo 9:41    **2:22:** Snd 26:11    **3:1:** 2  
Pi 1:13

a da fe, eghti ia ua bizir kabagh nighnighvira ikiam, egh ian nighniziba bar deravira ikiam.

<sup>2</sup> Ia ua Godin akam inigha izir gumaziba fomira mikemezir akabagh nighnighasa ki ifonge. Egh ia uaghan Ekiamin akabagh nighnigh, a en Akurvazir Gumazim. Ia uan aposelba da akar kam inis.

<sup>3</sup> Ezi ia faragh bizir ekiar kam gifogh, Ekiam ua izamin dughiamin, gumaziba uan navir ghurimin arazibar gin mangiva dibovir akar kurabar ia mikimam. <sup>4</sup> Me kamaghin ia dipovam, “Jesus ghaze, a ti ua izam, o? Egha a managh iti? A izan kogham. En ovavir ovengeziba ua dikavan kogham. Ezi biziba fomira nguazim otozir dughiamin iti moghin ikia iza datirikin.”

<sup>5</sup> Me bizir kam gifogha, egha a ginighnighan aghua. Fomira God mikemezi overiam ko nguazim oto. Ezi God dipabav kemezi da iraghuezi nguazim oto. Ezi God dipamra nguazimin ingari.

<sup>6</sup> Egha gin God mikemezi dipaba uam oto. Ezi aperiam bar nguazir kam avara, ezi nguazim bar ikufi. <sup>7</sup> Kamaghira God fomira mikemezir moghin, a datirighin migirigiar igharazim aningi, datirighin overiam ko nguazim ikia avim bagha mizuai, avim otoghiva bar aning kuvaremegham. Ezi nguazim ko overiam Godin Kotiar Ekiam Otivamin Dughiam bagha mizuai. Dughiar kamın gumazamizir akirim ragha God gasaraziba, me bar kuvigham.

<sup>8</sup> Nan roroaba, ia bizir kam a bakinighnighan

---

**3:2:** Ju 17    **3:3:** 1 Ti 4:1, 2 Ti 3:1, 2 Pi 2:10, Ju 18    **3:4:** Ais 5:19, Jer 17:15, Ese 12:22, 12:27, Mt 24:48, Lu 12:45    **3:5:** Stt 1:6-9, Sng 33:6, Kl 1:17, Hi 11:3    **3:6:** Stt 7:11, 7:21, 2 Pi 2:5    **3:7:** Mt 25:41, 2 Te 1:8, 2 Pi 3:10    **3:8:** Sng 90:4

marki. Ekiamin nighnizim dughiar vamira mati, azenir aviriba, ezi azenir aviriba mati dughiar vamira. <sup>9</sup> Gumazir maba ghaze, Ekiam nimira ingari. Puvati. Ekiam uan akar dikirizimin gin ghua nimira arazibagh amir puvati. God gumazitam ovengan aghua. Gumaziba bar navibagh iraghasa a ifonge, egha an navim ian ikia ingara egha ia mizua iti.

### *Nguazir kam ko overiam givagham*

<sup>10</sup> Ekiam Izamin Dughiam zuamiram otogham, mati okimakiar gumaziba izi moghin. Eghti dughiar kamın overiam afuaragh pamten tingaghegh bar givagham. Eghti bizir nguazimin itiba sara bar isigh ameregh givagham. Ezi nguazim ko an itir bizir me amiziba ua ikian kogham.\* <sup>11</sup> E fo, kamaghira biziba bar givagham. Kamaghin ki ian azai, ia arazir manamin gin mangam? Ia uan naviba isi God daning, egh ia bar zuegh iki Godin arazibar gin mangi.

<sup>12</sup> Ezi ia Godin Dughiar Otivamim mizuamiva, egh ia bar puvira ingariva dughiar kamın aviraghti, a zuamira otogham. Eghti dughiar kamra overiam bar isigh givagham, eghti avir bar gavgavir mam otogh bizir God nguazimin

---

**3:9:** Ais 30:18, Hab 2:3, Ro 2:4, 1 Ti 2:4, Hi 10:37, 1 Pi 3:20    **3:10:** Mt 24:29, 24:35, 24:43, Mk 13:31, Lu 12:39, 1 Te 5:2, Hi 1:11, MAA 16:15, 20:11    \* **3:10:** (3.10) Grighin akam deragha a migeir puvati.    **3:12:** Ais 34:4, Mai 1:4, 1 Ko 1:7, Ta 2:13, 2 Pi 3:10

amiziba, da bar isiva ameregham.† 13 Ezi God overiar igiam ko nguazir igiam damuasa akam akiri, eghti Godin arazir aghuimra an aven ikiam. E bizir kamra mizua iti.

*E uari bagh ganiva, egh Ekiam bagh mizuamam*

14 Kamaghin, nan roroaba, ia fo bizir kaba da gin izam, ia dar mizuamiva pamtem ingariva egh Godin damazimin zuegh ikiva, Godin damazimin arazir kuratam damuan marki. Egh ia God ko navir amirizimin ikisi pamtem ingar. 15 Ekiam e bagha amirighavira ingari. Ia fogh, a uam e iniasa, kamaghin an arazir kam gami. Ezi God bar fofozir aghuim en aveghbuam Pol ganingi, ezi a uaghan kamaghira migirigiar kabara ia bagha da osiri. 16 Polin akinafarir osiriziba, da zurara bizir kabar gun migei. Guizbangira, akar maba akinafarir kabar aven ikiava, egha deravira bigha migeir puvati. Ezi e akar kabar mingarim gifoghasa bar ingangarir dafam gami. Ezi gumazir fofozir muziariba ko nighnizir gavgavir muziariba, me Polin osirizibagh iragha pazava a migei. Egha uaghan Godin akinafarimin itir akar igharaziba sara paza dav gei. Kamaghin me uarira uari gasighasisi, eghti God gin me gasighasigham.

---

† **3:12:** (3:12) 2 Pita 3:9 ghaze, Ekiam zuamira izeghan kogham, kamaghin a dughiam gumazamizibar anighti me navibagh iragham. Ezi kamaghin, gumazamiziba uari isi God daning, eghti bizir kam Ekiamin Dughiar izamim aghozagham. Gansi Ap 3:19-21in gan. **3:13:** Ais 65:17, 66:22, MAA 21:1, 21:27 **3:14:** 1 Ko 15:58, Fl 1:10, 1 Te 3:13 **3:15:** Ro 2:4, 1 Pi 3:20, 2 Pi 3:9 **3:16:** Ro 10:3, 1 Ko 15:51, 1 Te 4:15

<sup>17</sup> Nan roroaba, ia bizir gın otivamiba ia dagh fo. Gumazir Godin akaba batogha ifariba ia damuti, eghti ia nighnizir gavgavim ia datirighin itim ategh egh iran kogham. Ia iran koghsi, kamaghin bar deravira uari bagh ganiva tuiyigh gavgafigh. <sup>18</sup> Krai Iesus, a en Ekiam, a en Akurvazir Gumazim, a zurara ian apangkufi, ezi ia deravira a gifo. Egh an fofozim ko an apangkuvim ian navibar ikiva aghung mangi. Krai ziar ekiam iti, ezi ia an ziam fi, datirighin iki mamaghira ikiam. Guizbangira.

---

**3:17:** Mk 13:5, 13:23, 13:33, 1 Ko 10:12, Ef 4:14, 2 Pi 1:10-12      **3:18:**  
Ef 4:15, 2 Ti 4:18, 1 Pi 2:2, Ju 25, MAA 1:6

## **Godin Akar Aghuim; Akar Dikirizir Gavgavir Igiam**

### **The New Testament in the Aruamu language of Madang Province, Papua New Guinea, 2004 Edition Nupela Testamen long tokples Aruamu long Madang Provins long Niugini long 2004**

copyright © 2004 Pioneer Bible Translators and the Bible Society of Papua  
New Guinea

© Faith Comes by Hearing

Language: Aruamu

Translation by: Pioneer Bible Translators

### **Godin Akar Aghuim in the Aruamu Language**

This translation was produced by Pioneer Bible Translators, and was  
published in 2004 by the Bible Society of Papua New Guinea.

If you are interested in obtaining a printed copy, please contact the Pioneer  
Bible Translators at [www.pioneerbible.org](http://www.pioneerbible.org)

This translation is made available to you under the terms of the Creative  
Commons Attribution-No Derivatives license 4.0.

You may share and redistribute this Bible translation or extracts from it in  
any format, provided that:

You include the above copyright and source information.

You do not make any derivative works that change any of the actual  
words or punctuation of the Scriptures.

Pictures included with Scriptures and other documents on this site are  
licensed just for use with those Scriptures and documents. For other uses,  
please contact the respective copyright owners.

2021-03-04

---

PDF generated using Haiola and XeLaTeX on 21 Feb 2024 from source files  
dated 29 Jan 2022

8f6beb37-6783-55d5-91ed-8321cc3f5eea